

INUIT ATAQATIGIIT INATSISARTUNI



UKA2023/114

Oktobarip 26-at 2023

Asii Chemnitz Narup

Motorcykelinik ilumut eqqussisoqarsinnaangussanersoq oqallisissiatut siunnersuut.

(Bjørk Lange Olsen, Demokraatit)

Oqaaseqaat

Inuit Ataqatigiit pingaartippaat aqqusinikkut angallannerup isumannaatsuunissaa, minnerunngitsumik pisuinnarnut cykilertunullu – meeraappata inersumasuuppata utoqqaappataluunniit.

Landsrådip ukiut 50-it sinnerlugit matuma siorna aalajangersimanagera paasinaqaaq – tassa motorcykilinik nunatsinnut eqqussisoqarsinnaajunnaarsitsigamik.

Oqallissarisooq isumaqatigaarput oqarmat pissutsit qassitigut taamanikkorniit allanngornikooqimmata nunatsinnut motorcykilinik eqqussinissaq suli inerteqquataajuassanersoq nalilersussallugu pissusissamisuginnassasoq.

Europakunni, USA-mi nunat tamalaarpassuarni motorcykilerneq nalinginnaavoq. Inuppassuit atugarivaat ulluinnarsiutiginnarnagit aammali ungasissorsuarmut angallatigalugit. Allaat nunat killeqarfii akimorlugit takornariarlutik, misigisassarsiorlutik eqqarliminnullu tikeraarlutik. Motorcykilertut sukkalisaarujussuarsinnaapput nipitusaqalutik, biilerpassuit akulloqquallugit qaangeraasarlutik. Sukkasoorujussuullutik ingerlasarnerat immikkut paasisimasalinnit pissutaanerarneqarpoq ajutoortoqartarneranut ajunaartoqartarneranullu

Nunatsinni pissutsit allaaneroqaat.

Illoqarfigisatsinni nunaqarfigisatsinnilu sumukarniaraangatta ornitassagut ungasissorsuuneq ajorput, takisoorsuarnik aqqusineqanngilagut – nunatta nuannequterpassuisa ilaat. Aperisariaqarpugut ilumut motorcykilit

INUIT ATAQATIGIIT INATSISARTUNI



sukkasoorujussuarmik ingerlasartut atorfissaqartippagut?
Taamaassorinngilarput.

Nunatsinni aqqusinikkut angallannermut oqartussaafiup (færdelsområdet) suli danskit akisussaaffigivaat, misilittakkattalu uppersereerpaat akiussaaffimmik naammassinnittarnerat pitsaanerpaajunngitsoq. Assersuutitut eqqaaginnarsinnaavarput siorna aasami - ukiuni 23-ni biilnik mississuisoqarsimanani – kiisami missuiartortoqarmat.

Suliassaqarfiup taassuma nunatsinnit akisussaaffigilernissaanut tunngavissat tamarmik misissorneqassasut Inatsartut siorna aalajangerpugut, Naalakkersuisullu peqquneqarput Danskit oqartussaasuinut saaffiginnissutigissagaat (takuuk UKA 2022, immoortoq 60). Periarfissaq iluatsillugu Naalakkersuisut apeqquteqarfigissavagut – saaffiginnissutigeqquneqartup suliap sumut killinnersoq?

Naggaterpiaani oqaatigilarput:

Utoqqasaangulersugut puornaviangilarput taamani 1970-ikkunni motorcykilinik ajunaarnerit qassiit nalaakkatsigit. Ajutoornerit sakkortuut inuit inuunerannik naleqartut. Ajunaarnerpassuarnik allanik pissuteqartunik ilaqutariinni nunaqqatigiinnilu nalaatsinerluttuarpugut, tamatumuunakkut nammatagut naammaqaat, allanik pissuteqartumik ilaartoqinatigit.

Inuit Ataqatigiinni isumaqanngilagut motorcykilinik eqqussisoqaqqissinnaangornissap ammaannissaa piffissanngorsimasoq.

Taamaamat Bjørk Lange Olsenip, Demokraatineersup isummerfigeqqusai apeqqutit 5 isummerfiginnginnarpagut.

Qujanaq.